


四明叢書

張宗祥



四明張氏約園開雕

序


萬季野先生著歷代紀元彙考始唐帝堯元載甲辰迄
明崇禎十七年甲申凡五卷以年爲經以歷朝紀元爲
緯考史者一覽瞭如指掌古人云左圖右史圖譜之學
極深研幾鄭氏夾漈獨重之先生精於史人徒知其能
文學而不知其尤深於圖表其著歷代史表也或年經
而國緯或國經而年緯或主地或主時或著世系足補
前人之闕朱氏竹垞所謂攬萬里於尺寸之內羅百世
於方冊之間者也紀元彙考之作其意豈異是培林堂

書目著爲八卷續甬上耆舊傳作四卷惟抱經樓書目作五卷今通行則依據抱經樓本奉化孫玉仙先生吾師也嘗授定海李子川讀壯歲喜刻書尤致力於戴剡源集壽鏞得其戊子年手校本今珍藏之此書亦爲孫師重刊其續編則子川所輯顧原刊正續相連壽鏞以爲未合體例因以正編還萬氏之舊而以續編接萬氏至編書之年止別作一卷附刻焉蘇東坡曰堯舜以德三代以德與功漢唐以功秦隋後唐晉漢以力晉梁以弒以實言之則德與功不如德功不如德與功力不如

功弑不如力是堯舜而下得統者凡更四不如而後至
於晉梁東坡之言如此繼晉梁者皆以力者也然力而
加以功而稍稍有德以繼之則其祚必永有天下者
可不以德爲務哉抑又言之統之云者名輕而實重割
代爲史往往未得斯統而遽攘之六朝五代享國歲時
錯雜其間雖淵博如齊次風作歷代帝王年表不能糾
其失又如李申耆因葉兩垞紀元通考作紀元編其門
人六承如羅列歷代紀元之作識於簡末且稱經緯粲
然顧自丙辰爲始尊清高皇帝而降明統萬曆四十四

年於下縱其意在鋪張鴻烈然史筆豈應如此讀萬氏
彙考一書益見李氏之不如矣季野先生墓在奉化縣
西忠義鄉尊湖舉塢陽灌之山麓今方議重修因竝及
之民國二十五年二月後學張壽鏞序

墓圖



於庠先生爲漢之高密而手訂卯金之史爲隋之龍門而躬覲貞觀之理方聖清之肇造羣雲奮而颺起胡先生之高尙安布衣而不仕旣補表於歷代復編元以成紀洵百世之碩師柰一抔之就圯惟流風之在人來雞酒於學子面勺水之尊湖對季鷹之祠祀求遺像而末由繪墓圖之類趾俾論世知人者或有意於鄞陽之鄉與德星之里

後學孫鏘敬題

萬季野先生小像



萬氏宗譜內集

萬經輯

叔祖永入府君諱斯同字季野昌一府君第八子娶莊氏繼傳氏子一世標生於前明崇禎戊寅正月二十四日卒於康熙壬午四月初八日享年六十五歲府君著述甚富詳載誌傳葬奉化縣忠義鄉德星里蕁湖畝地方

孫玉仙師昔繪季野先生墓圖而憾求遺像而末由余今得之亟爲摹刻并諸卷首並錄宗譜一則於後以概先生之生平云壽鏞謹識

序

嗚呼此吾亡友萬季野先生之所編也先生博極羣書
尤熟於史自三皇帝紀以暨二十一史勝國實錄無不
背誦如流隱居甬上崑山徐大司寇聞其名延至京師
會朝廷方開明史局諸公屬以編纂司空去華亭王大
司空復禮延之余來京師與之遊者十餘年每見則問
近看何書有何著述勤勤以年老時邁毋荒歲月爲戒
嗚呼此豈今世之人哉壬午正月先生誕辰余與諸友
醵金往壽先生曰余不敢當也雖然諸君厚意不可卻

余有歷代紀元彙考八卷其以是爲劖劂資子且爲我
序其書時先生已患腳氣余諾之而不暇爲及四月工
未竣而先生歿陳子素堂爲竟其事余乃序之以行世
嗚呼先生已矣讀先生之書窺先生之學知好古篤志
之儒雖困阨於今其必有傳於後無疑也此編起唐帝
堯元載甲辰訖明崇禎十七年甲申四千年之閒以年
爲經以歷朝紀元爲緯令人一展卷而曆數長短年代
久近一統分割禪繼正僞瞭如指掌亦史學之一斑也
昔之萃聚列代者有世紀通曆通要通譜通載通鑑帝

統舉要曆稽古錄年代錄疑年錄甲子編年紀年世運
錄總皆紀年之書而浩衍繁多閱者不能舉其數行笈
不能載其書其簡而該者無如此編先生所著書甚夥
惟石經考二卷補歷代史表六十卷已付梓其未刊者
廟制圖考四卷周正彙考八卷儒林宗派八卷歷代宰
輔彙考八卷宋季忠義錄十六卷六陵遺事一卷庚申
君遺事一卷羣書疑辨十二卷書學彙編二十二卷崑
崙河源考二卷河渠考十二卷石園詩文集二十卷先
生既客死賴王大司空經紀其喪遣人護其柩歸家但

慮嗣子孱弱遺書零落使人不得盡見先生嘉惠後學之深思因校此編爲之泫然流涕而并載諸書之未布者以俟後之人續傳之康熙癸未長夏吳興溫睿臨撰

序

四明與余郡擊柝相聞鄉之人推經學者向以萬氏爲
稱首故予自兒時卽知李野先生但未獲從之游心竊
嘆焉歲乙亥余來京師而先生以王大司空延修明史
先數年至因就謁交甚懽先生爲人古茂淵邃不屑與
流俗伍落漠寡交惟二三同志者相與講道談藝則亶
亶不倦以故得至其前者弗易及旣與之接析疑賞奇
得以聞所未聞每自恨其相見之晚也時茗上溫子鄰
翼亦在都與先生爲講會士大夫聚者常數十人先生

據高座凡禮樂源流典章沿革圖書曆象河渠邊務惟所欲奮袖抗談問難蜂起應之如響溫子從旁筆記其語歸而考證諸書爲文其詞今所著講會錄是也先生著述最富余皆受而讀焉壬午春以歷代紀元彙考八卷付之梓閱兩月而先生謝世余爲竟其事而悲先生之不及見其成也先生爲一代文獻之宗雖無位於朝而名聞海內其他撰著足以嘉惠後學者尙待刊布天下旣無由而覩獨是編幸已告竣上下四千年閒興廢成敗莫不瞭如指掌亦可以見先生之學爲有用而其